

Jornal Independente, 30 Outubro 2018



Diretór Jerál Finansas Estadu Ministériu Finansas, Januário da Gama

KRO Konklui OJE 2019 Biliaun \$1.350, Posibilidade Aumenta Tokon \$300

DILI: Komisaun Revizaun Orsamentu (KRO) konklui ona Orsamentu Jerál Estradu (OJE) 2019 hamutuk biliaun \$1.350. Maski nune'e, possibilidade sei aumenta tan tokon \$300, iha diskusaun Konsellu Ministru.

Orsamentu adisional ne'e nu'udar rezerva ba proposta ne'ebé apresenta husi Instituisaun autónomu estadu no mós liña ministeriál hamutuk tokon \$600.

Diretór Jerál Finansas Estadu, Ministériu Finansas, Januário da Gama hateten, husi OJE 2019 biliaun \$1.350, sei hasai tokon \$350 hodi sosa asaun ConocoPhillips, ne'ebé Estadu Timor-Leste ho kompañia konkorda hamutuk ona.

Nune'e, OJE tinan fiskál 2019 nian hela de'it biliaun \$1. Maibé, haree ba nesesidade husi instituisaun autónomu no liña ministeriál la sufisiente, tanba ne'e ezije atu aumenta valór.

Ne'e duni, aumenta plafond orsamentu tokon \$300 hodi rezolve despreza nasional 2019. Tanba Governu sei implementa programa prioridade hitu atu implementa hanesan infraestrutura, saúde, edukasaun, agrikultura, descentralizasaun administrativu, turizmu ho setór privadu.

Nia hatutan, husi total proposta adisional ne'ebé tama, ekipa KRO MF husu liña ministeriál ho intuisaun Estadu tenke asegura prinsipiu orsamentu fiskál ho transparénsia no akontabilidade hodi garante OJE la'o di'ak.

Tuir planu, iha lora 6 Novembru 2019, ekipa KRO sei apresenta proposta lei ho tetu final iha Konsellu Ministru hodi hetan aprovasaun final, nune'e bele apresenta no diskute.